

DOMINGU XI TEMPU KOMÚN – TINAN C

Tema

Liturjia domingu ne'e nian apresenta mai ita Maromak ida laran-di'ak no laran-sadia nian, ne'ebé detesta salan, maibé hadomi ema maksalak; tanba ne'e, Nia hakbarak ninia oferta salvasaun nian. Husi deskoberta Maromak ida hanesan ne'e, sulis mai ita domin no vontade atu moris vida foun, integra an iha ninia família.

Leitura dahuluk apresenta mai ita, liuhusi David maksalak nia istória, Maromak ida ne'ebé la halo moruk ho salan, maibé mós la husik sala-na'in ne'ebé rekoñese ninia falta no aseita don laran-sadia nian.

Iha *leitura daruak*, Paulo garante ita katak salvasaun mak don gratuitu ne'ebé Maromak oferese, la'ós konkista umana ida. Atu iha asesu ba don ne'e, la'ós fundamentál kumpre ritu sira no kumpre lei sira didi'ak. Maibé presiza adere ba Jezús no identifika an ho Kristu iha domin no iha saran-an: ida-ne'e mak lori ba moris nakonu.

Evanjellu lori ita atu hateke ba “feto aat sidade nian” no mai tanis iha Jezús nia ain. Lucas halo ita entende katak feto ne'e nia domin mak rezultadu husi ninia esperiénsia rasik kona-ba Maromak nia laran-sadia. Don gratuitu perdaun nian hahoris domin no moris foun. Maromak hatene ida-ne'e; tan ne'e mak nia halo nune'e.

LEITURA I – 2 Sm 12,7-10.13

“Livru Samuel” nian (fahe ba parte rua) mak livru ida ne'ebé apresenta monarkia nia hahún, iha Israel. Maibé la'ós livru ida ne'ebé polítiku sira, istoriadór sira ka sosiólogo sira mak hakerek; ne'e mak livru ida teólogo sira mak hakerek, ho empenhu atu halo katekeze no atu lee istória iha fiar nia roman. Sira nia interese la'ós leitura objetiva akontesimentu nian; sira interese liuliu, atu leitura livru ne'e nian, tulun fiar-na'in sira atu hasai konkluziun kona-ba Maromak no kona-ba atuasaun/hahalok Maromak nian.

Testu ne'ebé ohin propoin mai ita halo parte konjuntu ida tradisaun sira-nian kona-ba David nia ukun (kf. 2 Sm 7-20). Depoizde deskreve David nia salan (katak nia halo salan adultériu ho Betsabé ne'ebé haruka tiha nia la'en – Urias, soldadu ida ezérsitu David nian – karik tau nia iha fatin risiko nian, iha kombate hasoru amonita sira, atu nia tama iha perigu no mate – kf. 2 Sm 11,1-27), autór deuteronomista apresenta – liuhusi profeta Natán – reasaun husi Maromak hasoru liurai nia salan. Ita iha Jerusalém – iha tempu ne'ebá, kapitál Israel sei ida de'it – iha tinan dahuluk sira sék. X mK.

MENSAJEN

Maromak bele halo aliansa ho atitudo egoísta no prepotente liurai nian? Lae duni. Husi profeta Natán nia ibun, autór deuteronomista haklaken katak Maromak la sai indiferente hasoru injustisa ema halo no husu konta ba agresór. Husi ne'e mak razaun anúnsiu kastigu nian hasoru David no nia uma-kain.

Autór deuteronomista hakerek buat ne'e tinan barak liutiha akontesimentu sira-ne'e. Nia koñese desgrasa lubuk ida ne'ebé, kona David nia família (mate mean David nia oan-mane na'in tolu: Amon – kf. 2 Sm 13,23-39; Absalaun – kf. 2 Sm 18,9-15; no Adonias – kf. 1 Re 2,24-25). Naturalmente, la'ós Maromak nia kastigu, maibé akontesimentu istóriku normál,

típiku época violenta nian, iha ne'ebé luta ba poder, dalabarak hotu ho trajédia pesoál no familiár sira; maibé teólogo sira lee akontesimentu sira-ne'e nu'udar sinál klaru katak Jahwéh la halo aliansa ho injustisa no arbitrariedade sira liurai komete. Ita-nia "katekista" nia misaun evidente liu: Maromak la husik de'it ema sira nia atitude ne'ebé aproveita poder ba finalidade egoísta no estraga maun-alin sira nia moris.

Liafuan ikus testu nian mak esperansa. Hodi konfronta an ho ninia krime, David rekoñese ho haraik-an, ninia komportamentu laloos no husu perdaun; no Maromak perdua nia. Nune'e, deuteronomista rezume Maromak nia lójika, ne'ebé kondena salan, maibé la abandona maksalak. Ita-nia katekista haruka mensajen ida ba ema sira ita-nia tempu nian: apezárde ita-nia salan sira, Maromak nia laran-sadia la husik ita no fó nafatin ipóteze atu hahú filafali.

LEITURA II – Gal 2,16.19-21

Komunidade sarani Galásia nian (sentru Ázia Menór nian) moris iha ambiente instabilidade uitoan iha tinan sira 56/57. Ne'e tanba pregador sarani orijen judaika, ne'ebé to'o iha zona ne'ebá, buka impoin ba gálata sira prátika Lei Moisés nian (kf. Gal 3,2; 4,21; 5,4) no, ho modu partikulár, sirkunsizaun (kf. Gal 2,3-4; 5,2; 6,12). Sira, mak "judaizante sira" ne'ebé, iha dékada dahuluk kristianizmu nian, lori konfuzaun barak ba comunidade sarani orijen husi pagaun sira.

Paulo lakohi halo paktu ho ezijénsia sira-ne'e. Ba nia, lia ne'e la'ós sekundária maibé kona esensiál fiar nian: se obra sira Lei nian fundamentál, ne'e tanba Kristu mesak la bele soi. Ida-ne'e loos? Kona-ba kestaun ne'e, Paulo iha ideia klara/moos; Lei Moisés nian la importante ba salvasaun.

Iha ambiente ne'e mak Paulo hakerek ba gálata sira. Nia dehan ba sira katak ritu judaizante sira kesi sira ba moris-atan ida ne'ebé Kristu mai kore tiha ona ka liberta ona. Surat ne'e firme no ko'alia maka'as atu defende buat ne'ebé esesniál iha fiar.

Analiza tiha situasaun (kf. Gal 1,6-10), hateten tiha katak nia iha mandatu ida husi Kristu atu haklaken Evanjellu ba jentiu sira (kf. Gal 1,11-24) no defende nia an husi akuzasaun katak nia haklaken evanjellu rasik, lahanesan ho ida apóstolu sira nian (kf. Gal 2,1-10), Paulo bá haklaken "ninia" Evanjellu (Evanjellu Kreda nian, hanesan ho ida apóstolu sira haklaken): la'ós Lei no obra sira mak salva, maibé fiar.

MENSAJEN

Testu ne'e apresenta Paulo nia sínteze kona-ba buat ne'ebé nia konsidera Evanjellu auténtiku. Iha primeira parte (vers. 16), Paulo sustenta katak salvasaun mai, mesak no ho modu eskuzivu husi Kristu. Husi Kristu mak ita hetan "justifikasaun" no la'ós husi obra sira Lei nian. "Justifikasaun" iha ne'e, sinónimu "salvasaun" nian. Signifika katak "Maromak nia justisa" (ne'ebé la'ós aplikasaun loloos lei sira-nian hanesan iha tribunál, maibé Maromak nia fidelidade ba kompromisu sira nia asume ho nia Povu, atu so'i nia) fó ho modu gratuitu domin no laran-sadia ba ema, maski ema sala-na'in la merese. Maromak "so'i" ema maksalak, la'ós tanba nia kumpre Lei Moisés nian, maibé tanba fiar iha Jezús ("fiar" signifika adere ba Nia, tuir Nia).

Iha segunda parte (vers. 19-21), Paulo halo reflesaun kona-ba Kristu nia asaun no Lei nia asaun, atu so'i ema. Lei salva? Lae. Hodi hedi Jezús iha krús, Lei demonstra katak nia la hahoris moris, maibé mate; nune'e nia la bele lori ema ba moris nakonu. Responsavel ba Jezús nia mate, Lei la iha ona lejitimidade atu impoin no nia la sai jeradora moris nian. Kristu fali, ho nia vida no, liuliu ho nia mate (ne'ebé Lei mak provoka) hatudu Lei nia falénsia no liberta ema sira husi rejime ida ne'ebé hamosu de'it moris atan nian no mate.

Kona-ba nia an, Paulo identifika an tomak ho Kristu. Sai ida de'it ho Kristu, Paulo mós Lei hedi tiha ona nia ba krús, ho Kristu, nia deskobre katak Lei la hahoris vida, maibé mate. Nune'e, nia aprende katak Kristu de'it mak fó moris no Kristu de'it mak liberta. Iha identifikaun ho Kristu ne'ebé hadomi no saran an tomak no la'ós ho Lei, mak Paulo deskobre moris nakonu, moris Ema Foun.

Konkluziun: Lei hamosu mate; Kristu de'it mak salva. Ne'e mak Paulo nia konviksaun kle'an ne'ebé nia buka tatoli ba gálata sira.

EVANJELLU – Lc 7,36 – 8,3

Testu ohin nian situa ita iha primeira parte Evanjellu nu'udar Lucas haktuir. Di'ak atu hanoin katak primeira parte ne'e hala'o iha Galileia, liuliu hale'u Tasi Tiberíades. Durante faze ne'e, ita haree hanesan Jezús konkretiza ninia programa: lori ba ema sira – liuliu kiak no iha ninin – liberdade no salvasaun husi Maromak (kf. Lc 4,16-30). Epizódiu ne'e tau iha evidénsia tema ida Lucas gosta liu: Jezús nia laran-sadia ba ema sira ne'ebé presiza libertasaun. Iha epizódiu anteriór Lucas taka hodi fó sai Jezús nu'udar ema maksalak sira nia belun (kf. Lc 7,34); oras-ne'e, prinsípiu ne'e sei hatudu ho faktu réal ida.

Epizódiu koloka ita iha ambiente ida han hamutuk nian, iha fariseu hanaran Simaun nia uma (“han hamutuk” iha kontestu ne'e, mak espasu ida familiaridade nian, irmandade nian, iha ne'ebé harii no hametin ligasaun sira entre ema). Lucas mak evanjelista mesak ne'ebé hatudu farizeu sira besik ho Jezús to'o simu atu han hamutuk ho Nia (kf. Lc 11,37;14,1) no prevene Nia kona-ba Erodos nia ameasa (kf. Lc 13,31). Lucas kona-ba ne'e, besik liu ba realidade istórika duké Marcos no, liuliu, duké Mateus (ne'ebé hetan influénsia husi polémika Kreda dahuluk nian ho farizeu sira, nune'e apresenta ho modu sistemátiku fariseu sira nu'udar Jezús nia adversáriu).

MENSAJEN

Epizódiu ida-ne'e hatudu Jezús nia atitude (no Maormak nian) ba ema maksalak sira. Personajen sentrál mak feto ne'ebé Lucas apresenta nu'udar “feto aat ida moris iha sidade”. La dehan katak nia iha ona kontaktu ho Jezús molok, maibé ita bele supoin katak nia hasoru ona Jezús no haree iha Nia atitude diferente husi mestre sira tempu ne'ebá nian, ne'ebé nafatin preokupa atu evita ema maksalak ne'ebé ema hotu hatene no kondena sira. Feto nia hahalok (tanis, matan-been iha Jezús nia ain sira, hamaran ho nia fuuk, re'i nia ain sira no kose ho mina-morin) hetan deskrisaun nu'udar resposta gratidaun nian, nu'udar konsekuénsia ba perdaun nia simu (vers. 47). Ai-kanoik ne'ebé Jezús haktuir iha situaun ne'e (vers. 41-42), hanesan atu dehan katak, la'ós katak perdaun mai husi domin boot ne'ebé feto ne'e hatudu, maibé katak feto nia domin boot ne'e mak rezultadu husi Jezús nia atitude laran-sadia nian: domin boot ne'ebé feto ne'e hatudu mai husi fuan ne'ebé agradese tanba Jezús ho nia jestu la marjinaliza ka esklui nia, no husi ne'e nia haree Maromak nia laran-di'ak no laran-sadia.

Figura sentrál seluk iha epizódiu ne'e mak Simaun. Nia reprezenta defensór maka'as Lei nian, ne'ebé evita kontaktu naran de'it ho ema maksalak sira no hanoin katak Maromak rasik la bele simu ka husik sala-na'in sira ne'ebé kontra Lei no morál, kona Nia. Jezús buka atu halo nia komprende katak Maromak nia lójika de'it – lójika ida domin no laran-sadia nian – bele hamosu domin, nune'e mós, konversaun no moris foun. Jezús buka atu hatudu ba Simaun katak la'ós hodi marjinaliza no haketak sira mak bele hetan atitude foun husi ema maksalak; maibé hodi hadomi no simu mak bele nakfilak fuan sira no hamosu husi sira domin: ida-ne'e mak Maromak nia perspetiva. La fó perdaun atu troka ho domin, maibé

simplesmente fó, hodi la hein selu. Jezús nia reasaun mai husi nia misaun rasik ne'ebé simu husi Maromak: dehan ba ema sala-na'in sira katak Maromak la kondena ka marjinaliza sira, maibé mai hasoru sira atu liberta sira, atu fó dignidade ba sira, atu bolu sira ba festa han hamutuk eskatolójiku iha Reinu. Ida-ne'e mak atitude ne'ebé hahoris domin no vontade atu hahú moris foun, iha lójika Reinu nian.

Testu remata ho referénsia ba grupu ne'ebé akompaña Jezús: sira na'in Sanulu-resin-rua no fetu ruma. Faktu katak “mestre” husik atu fetu sira akompaña nia (Lucas mak evanjelista mesak ne'ebé haktuir fetu sira-nia inkorporasaun iha dixípulu sira-nia grupu itinerante) mak buat ruma la baibain, iha sosiedade ida iha-ne'ebé fetu la iha papél sosiál no relijiozu.

Maromak nia lójika la esklui ema ida, maibé integra ema hotu – laho esesaun – iha comunidade Reinu nian. Fetu sira – grupu ho estatutu ida submisaun nian, ho direitu sosiál limitadu tanba organizasaun sosiál tempu ne'ebá nian – integra an mós iha comunidade maun-alin sira-nian katak, comunidade Reinu nian: Maromak la esklui ema ida nune'e mós la marjinaliza ema ida, maibé bolu ema hotu atu halo parte iha ninia família.